

**INTERVJU** Geri Hafman, komandant NATO štaba u Sarajevu

# Organizirani kriminal je opasniji od ekstremizma

Kriminal, korupcija, politička stagnacija i ekonomski problemi važniji su faktori sigurnosti u BiH nego navodni ekstremizam • Vrata NATO-a ostaju širom otvorena

**Razgovarala: Sanja SABANADŽOVIĆ**

Stabilnost, sigurnost i napredak BiH neće biti bolji sve dok se političke vode oba entiteta ne okupe i slože oko zajedničkog dobra zemlje, izjavio je u intervjuu za „Dnevni avaz“ brigadni general Geri Hafman (Gary E. Huffman), novi komandant NATO štaba u Sarajevu. Prema njegovim riječima, trenutni politički zastoj odlaže evroatlantske integracije BiH, a NATO pomno prati situaciju u našoj zemlji.

## Brojni kontakti

□ **S obzirom na to da ste tek došli u BiH, koliko ste upoznat s političkom i sigurnosnom situacijom u našoj zemlji i na koji način vidite bh. stvarnost?**

- Otkako sam stigao u BiH prije tri sedmice, imao sam mnogo sastanaka sa svim našim lokalnim i međunarodnim sagovornicima. Osim toga, moj tim u NATO štabu Sarajevo me je izvjestio o svim važnim političkim i sigurnosnim aspektima naše misije u BiH, kao i o općoj situaciji u zemlji.

Prema njihovoj ocjeni, sigurnosna situacija u BiH je stabilna, ali postoji značajan prostor za njeno poboljšanje. Organizirani kriminal, korupcija, politička stagnacija i ekonomski problemi važniji su faktori sigurnosti nego navodni ekstremizam. To su neki negativni aspekti koje sam primijetio u ovom kratkom periodu.

□ **Naša zemlja već duže vremena očekuje ulazak u NATO i EU, ali je u pitanju samo politička volja naših političkih vođa koji bi trebali da saraduju kako bismo prešli i taj put. Koliko smo već vremena izgubili na politička odugovlačenja?**

- Tokom prošlonedjeljne posjete Crnoj Gori, generalni sekretar NATO-a Fog Rasmussen (Fogh Rasmussen) izjavio je da je NATO pozvao BiH u Akcioni plan za članstvo zato što želi vidjeti BiH kao dio evroatlantske zajednice i zbog toga što je Predsjedništvo BiH donijelo jedno-

glasnu odluku da aplicira za učešće u MAP-u.

NATO želi pomoći političkim vođama BiH u reformi zemlje. U skladu s time, i kao što je generalni sekretar izjavio, pozivamo političke vođe BiH da ostvare dodatni napredak i pokažu viziju, sposobnost vođenja i postizanja kompromisa. Rješenje pitanja imovine pokazalo bi da BiH funkcionira kao jedna država i da je sposobna komunicirati s NATO-om i ispuniti svoje obaveze iz Akcionog plana za članstvo.

□ **Kada će BiH ući u NATO? Postoji li neki rok da se riješi status vojne imovine? Kolike su šanse da za vrijeme Vašeg mandata postanemo članica NATO-a?**

- Što se tiče pitanja kada će BiH ući u NATO, put ka članstvu u NATO-u je proces koji se zasniva na rezultatima, a političke vođe BiH odgovorne su olakšati ostvarivanje tih rezultata. NATO ne postavlja rokove, a nije moguće ni dati nekakav optimalan rok za stupanje u članstvo, jer napredak zavisi od rezultata.

## Jasne obaveze

□ **Kolika je podrška unutar same organizacije NATO-a našoj zemlji za članstvo?**

- Opredjeljenje NATO-a za BiH kao partnera i potencijalnu zemlju članicu ostaje nepromijenjeno. Vrata NATO-a ostaju širom otvorena svim evropskim demokratijama koje dijele vrijednosti ovog saveza i koje su voljne i sposobne preuzeti odgovornosti i obaveze članstva i čije uključene može doprinijeti većoj sigurnosti i stabilnosti. Generalni sekretar je kazao da žele početi prvi ciklus MAP-a s vašom zemljom čim je prije moguće, ali da je ključ tog procesa u vašim rukama.



Hafman: NATO pomno prati situaciju

## Odluku o povlačenju donosi Predsjedništvo BiH

□ **Hoće li se vojnici Oružanih snaga BiH koji su u mirovnoj misiji u Afganistanu uskoro vratiti, poput američkih vojnika?**

- Slanje bh. vojnika u mi-

rovne misije je odluka koju donosi Predsjedništvo BiH, koje će odlučiti i o svakom budućem učešću vojnika OSBiH u Afganistanu. Sto se nas tiče, mogu reći da su

pripadnici OSBiH pozitivno doprinijeli sveukupnoj misiji ISAF-a i pri tome na najbolji način predstavili svoju zemlju. Sve informacije koje smo dobili iz ISAF-a su

pozitivne. Pripadnici BiH u ovoj operaciji sigurno pozitivno doprinose sveukupnoj misiji ISAF-a i na najbolji moguć način predstavljaju svoju zemlju.